

Suandar Vitus Huonder duai in administratur apostolic

■ (rtr) Per motivs da vegliadetgna vegn l'uestg Vitus Huonder ad offrir al papa l'onn proxim sia demission. Il vicari general da la Svizra originara, **Martin Kopp**, pretenda che la proxima elecziun da l'uestg vegnia spustada per calmar la situaziun tendida en l'uestgieu. Il papa duaja enstagl nominar in administratur apostolic per in temp fixà. Quai ha ditg Kopp en in'intervista che las gasettas «Tages-Anzeiger» e «Bund» han publicità. Quest administratur duess vegnir d'ordaifer ed avair il carisma da turnar a l'uestgieu la fidanza e la pasch.

Kopp è fermamain dal maini ch'i na sappia betg ir vinavant sco enfin qua en l'uestgieu a Cuira. El è da l'avis che l'uestgieu saja uschè bun sco mort sch'i vegnia elegì insatgi da la grappa che saja gia uss al timun a Cuira. Turitg e la Svizra originara na sajan betg pronts d'acceptar quai e sa tegnissan davent da Cuira.

L'uestgieu a Cuira pateschia dapi decennis

L'avis ch'i dovria ina nov'entschatta per l'uestgieu a Cuira vegnia partù lunsch enturn. El exprimia quest problem per ch'i vegnia era prì vair a Roma. El spera ch'i dettia scleriment e che la schientscha per la responsabladad turnia per l'uestgieu che patentschia dapi decennis.

Mesira speziala, dentant betg nova

Pir il 2014 ha papa *Benedetg* il sedeschavel nominà in administratur apostolic. En l'uestgieu Limburg en Germania ha quel surpiglià il post da l'uestg *Franz-Peter Tebartz-van Elst*. Quai sunter che l'uestg ha desistì da manar vinavant ses uffizi ecclesiastic pervia da la critica vi da sia persuna entaifer ed ordaifer l'uestgieu.

Tenor *Urban Fink*, il directur da l'ovra d'agid catolica Inländische Mission, ch'è stà sur 10 onns manader da redaziun da la «Schweizerische Kirchenzeitung», haja in administratur apostolic tut tenor ils medems dretgs e pensums sco in uestg. I dependia dentant dal papa. Lez nomineschia l'administratur apostolic e decida tge obligaziuns ch'el haja, di Fink.

Dapi onns datti stentas da reorganisar l'uestgieu da Cuira. Tranter auter cun stgaffir novs uestgiefs a Turitg ed en la Svizra originara. Huonder, ch'è conservativ, ha da ses maun adina puspè chaschunà discussiuns. El aveva pretendì dad in pader a Bürglen UR da demissionar perquai ch'el aveva enzinnà in pèr dunnas lesbicas. Pli navant era el s'exprimì negativamain davart omosexuals a Fulda en Germania.



Sunter la demission da Vitus Huonder duess l'uestgieu vegnir manà d'in administratur apostolic.